

SAN JUDAS

Yi Necy Huidibi Judas Nijayiy Je Huidibi Dios Ti Huin'ijxigixy

¹Hich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jëbi mibijccixy yi' y'ayuc huidibi jëbi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymiid.
²Huen Dios miich ajcxy mijcajee xypa'ayoogixy etz xyajjotcugiiygixy etz chojccixy xyjihuiygixy.

Yi' ajcxy huidibi yaj'ixpijcp anii

³Miich ajcxy migügtijc huidibi ooy ndzocyich njihuiyich, miid je nidzoocin ycixpi miid ajt n'alma huidibi miich ajcxy etz iich cham nmiid'ajtim , ooy chachycopicity co nijayihuibich miich ajcxy miid yi mibijcin ajcxy ycixpi, e ngohuaniiyb ajcxy co jëbi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuiñyäj. ⁴Naagity jäy ajcxy ti ytiigixy ma miich ajcxy ayüch ameech miid anii. Jecy'ajty Dios tiy'ajt yejcy ma yi'

y'ayuc co yi jadu'mbi jäy tigoyam ajcxy y'alma miid ypocy ycixpi. Hue' yi' ajcxy jibic jäy huidibi ca' huindzigiigixy Dios. Aniidaacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jëbi nduunim huen tijity huidibi nijot'ajtim. Ca' cöbijccixy je Dios huidibi nHuindzin'ajtim, etz ca' cöbijccixy iich ajt nHuindzin Jesucristo.

⁵Oy miich ajcxy ti mjanejhuiydaaygixy jada tiy'ajt, per nyajjäymetzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'axam tzaachytuuñ miid o'cin je huidibi anajty ajcxy nijëjty ca' ymibijccixy. ⁶Je ángeles huidibi ajcxy ca' yhui'my ma Dios ytung huidibi ajcxy capxycömidadacy Dios, y'ixmajtztay ajcxy y'it chinaydac. Dios je' cham miid'ajtp ajcxy ahuing. Mach ajcxy y'lity agoodztuuby huinixii huinitiempo ixti cooni je mij xii anajty Dios ti yajhuaad'aty, mina anajty tiyduna'ñ naaxhuiñyäj ajcxy miid ypocy

ycixpi. ⁷Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuudungixyp ñinïcx chojcin, naygiyejci ajcxy ma je jibic-huinma'ñ. Yëydijctijc ytundigooygixy miid huingbi yëydijc. Je' jadu'n hui'm iixpejt ma tüg'óciy jäy co je tzaachypi ajcxy paatcixy.

⁸Jim yajpaady ma miich ajcxy jäy huidibi nejhuiyb co Dios jecy'ajty tzaachytuun ángeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicciygixy je ñinïcx miid pocytunii. Jijpcogapxiygixy je Dios ycotujcin, nigapxcixy ni'ojiygixy je huidibi ajcxy Dios mooyip mij'ajtin. ⁹Je arcángel, Miguel, je ángel huidibi mij'ane'min miid, co anajty ychiptuñ miid je mujcu', yajcapxyoongixy yaj'ayucyoongixy je Moisés ñinïcx, ca'p je' miid'ajty huinma'ñ nicxy yajpocycäy je mujcu' miid nay'oji. Jëyi janch co nimay: “Yi Huindzin Dios miich xy'ix'ojip.” ¹⁰Per jada jäy ajcxy jibic ooy nigapxcixy huidibi ca' nejhuiygixy. Tügiyb ajcxy yhuinma'ñ miid iyujc animal yhuinma'ñ, etz iyujc animal ca' ajcxy miidity huinma'ñ tiyudägyi. Ci'm jada jäy ajcxy ñayyajhuinma'ñydidgooyigixy, e jadu'n ajcxy y'alma yajtigoyaangixy.

¹¹Ypadamyb ajcxy tzaachypi mijcajee miid pocy ycixpi com je' yi' ajcxy ypadumyib nej Caín y'idiich. Miid co meen tzach'adzojcixy, paady ñidigooygixy ytüdigooygixy jadu'n nej Balaam ñidigoy

ytüdigoy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucjiipcogapxiyi. ¹²Yi jadu'mbi jäy tzo'ydu'n yejcp ma miich ajcxy co mgaaygixy m'uuccixy tügmucy miid yi' ajcxy, e jadu'n iixpejt yejccixy co mnaychójcigixy. Caaygixp uuccixp tügmucy miid miich ajcxy agujc jotcujc per ni ca' ajcxy miidity huindzigi'ñ miid ymigügtijc. Jadu'n ajcxy nipaady nej cöbixy cuend'ajtpi huidibi ci'm ñaygüend'ajtigixyp, e ca' tungixy cuendi je cöbixy. Jadu'n ajcxy nej joc huidibi ca'pi ñi miidity, huidibi je poj yajhuidijtip. Jadu'n ajcxy nej quipy huidibi ca' ytiim'aty mina yjapadyi, jayijp y'ocniicxy, e chi jada ytiich, e ytimypidëgy miid ñidictz. ¹³Yi' ajcxy ytundigoyii ooy cho'ydu'n yecy, tim jadu'n nipaady nej je mejy y'oobëgy co ypidëgy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixii huinitiempo, mij'agootztuuyb y'idipy ajcxy.

¹⁴⁻¹⁵Nañ jadu'n Enoc, je mihuixtucpi co anajty Adán ti yjayijp'aty, yminañ co Dios yhuinma'ñmooyi miid jada ycixpi, e yminañ: “N'ijxich je Huindzin Dios co anajty ymiin miid janch canaag mil je huidibi ajcxy tudägyity etz huätzip. Co anajty tiyduna'ñ ajcxy tüg'óciy naaxhuiñyjäy miid ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytundigooygixy miid yjibicjäy'ajt etz miid jibic ayuc tiibi miid nigapxcixy ni'ojiygixy Dios.”

¹⁶Jada jibic jäydijc ca' ajcxy ni ti mijotcuje'ajtcixy, ooy nigapxcixy ni'ojiiygixy ymigügtijc. Jëyi ajcxy yci'm jotcuje'ajt ixtaaygixy. Ycapxcixy amij agix. Ooy oy nigapxcixy nijëjity jäy miid co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷Per miich ajcxy migügtijc huidibi iich ooy ndzocy, jäymejtcix je ayuc huidibi jëcyip ti najtzcapxiygixy je Huindzin Jesucristo y'apóstones ajcxy. ¹⁸Je apóstones miich ajcxy xyñimay: “Ma anajty xii tiempo ycixaani, ji'adip jäy ajcxy huidibi nixigipy yaxxigipy huidibi Dios yje'ajtpy, e chináaygixipy jadu'n nej yi' ajcxy ci'm tzachnijot'ajtcixy jibic-huinma'ñ.” ¹⁹Je' ajcxy yajnaybijc-huäcxiib mibijcpidijc co ca' ajcxy miidity je Dios yjihui'ñ ymic'ajt.

²⁰Per miich ajcxy migügtijc huidibi ooy ndzocyich njihuüyich, ijtcix miich ajcxy tudägy ma yi mmibijcin. Jäymejtcix mibijctzoogix Dios miid je Espíritu Santo ypubejtin. ²¹Naygüend'äjtigix jigix jëbi Dios xychojccixy xyjihuiygixy ajcxy, e ahuijxcix je xii mina anajty iich ajt nHuindzin

Jesucristo xymöhuaanim je jugy'ajtin huidibi ca' ycixipy ytigoyipy ni mina miid co ti xypa'ayoohuim.

²²Capxjotcidaaccix pinjaty ca' ti mijpidägy janchypidägy. ²³Yajmiidmiydaaccix jacjadyii migügtijc jigix ajcxy jëb paatcixy nañ jadu'n nïdzoocin miid ajcxy y'alma. Jadu'n anajty paady nej jihuüy myajpidzimgixy jijnjoty. Yajtungix pa'ayo'n miid jacpinjaty pocytumbi. Naygüend'äjtigix ma yi' ajcxy ypocytunii, ca' mbocytungixy nañ jadu'n. Jadu'n yi' ajcxy ypocytunii nipaady nej huit huidibi ti yjibicci'y.

Judas capxycixy miid je' ymigügtijc

²⁴⁻²⁵Je Dios tügpajcpi, je Dios huidibi xyajnidzoocim ajt n'alma, je huidibi yjajtaayb ñejhuiydaayb, ymiid je' mic'ajt etz cötujcin jëbi miich ajcxy xycuend'adipy jigix ca' mbocycägixipy, etz je' ymiid mic'ajt jigix jëbi xyajja'tcixy agujc jotcuje ma Dios yhuinduu, ma yi' yajpaady miid y'oy'ajtin ymij'ajtin ca' ti mbocymiidity ajcxy. Yi' paatip je oy'ajtin etz mij'ajtin etz mic'ajt etz cötujcin miid nHuindzin Jesucristo ycixpi, tiüyip etz cham etz huinixii. Amén. Jadu'n ngapxycixyich.